


## 1871 - Reclamaziun pervia d'in rapport

Ils extracts ord quella brev al Cussegl Pign pon segiramein motivar da leger la reclamaziun:

- Suenter ei vegniu pinau ora denter e zuar encunter la veglia dils beinpatertgonts vischins e cun zerclar ora dat ei persesez „Luft“
- Stad ed unviern da grondissimas nevadas cura che las cauras pon buca atras, vegn ei buca pertgirau.
- ... e quei ei meglier pils selvadis che „Theori“
- ... ch'ei seigien revoluzers che vulan ni admoniziuns ni leschas ni camonds!
- ... quei duei daventar mai, num cun la surforza prussiana.
- ... ed enviar signur Seeli cun siu malfundau rapport tier siu bien ruaus.

## Reclamaziun pervia d'in rapport dils uauls en Tujetsch daus dil bostger circuital



Aultludeivel Cussegl Pign!  
Tit. Signurs!

Avon che raschun a il rapport daus en da signur bostger districtual ad els T. T. Signurs, il qual els han a nus, sut ils 23 da november 1870, tarmess tier, essend ad els t. t. signurs ordavon obligai d'engraziar per la buntadeivla suspensiuon dada, che pudeien era radunar e sentir ils sentiments da nos vischins, il qual ei ussa daventau e mess nus el stan da saver ad els t. t. signurs, per mauns da signur bostger cantunal, dar en nossa defensiuon e legitimaziun.

T. T. Signurs!

Signur bostger districtual Seeli fa attents in ludeivel Cussegl Pign egl ingress da siu rapport sils 13 d'october 1870, che nos uauls da **Maun Sura**, sco nus quels numnein seigien

1. seigien rars e clars I: luft :I
2. memia vegls (sche nus capin endretg überständig)
3. mondien alla fin I: Eingehen :I
4. la cuolpa da quei seigi il schliet tractament da quels uauls
5. la pasculaziun en quels, che impedeschi il crescher si plontas giuvnas

Sin il sura tschun pugns ei nossa risposta sco suonda:

1. Seigien rars! Quei savein era nus leider! Aber pudein era segirar e mussar ora che buca nus seigien la cuolpa da quei. Nos uauls da **Maun Sura** ha il suffel ruinau, e quei ina gronda da nies regurdar. Avon paucs onns pudeva negina sigir marschar en quels uauls, I: aber allura deva ei era megins bostgers :I Suenter, suandont quels, ei vegniu pinau ora denter e zuar encunter veglia dils beinpatertgonts vischins e cun zerclar ora dat ei persesez „Luft“: la cuolpa da quei ein nos bostgers, suenter il suffel, e quei vegn il temps a sclarir e dar perdetga.

2. Savein cun il rapport da signur Seeli, tenor veglia experienza buca esser en general cun sia expressiuon d'accord, ch'ei seigien „überständig“, bein aber ch'ei seigi en mintga uaul vegls e giuvens, sche las plontas veglias fussien bein ora, aber mo en quei cas, sch'ins savess quellus

sco il hortulan alzar ora senza donn dallas giuvnas ed el medem temps plantar ina outra cun esser segirs ch'ella maunchi buca.

3. Mondien a sia fin! e quei ei fetg natural, tuttas caussas han ina entschatta ed ina fin ed ils mettels per prevegnir a quella tresta caussa ein aunc buca inventai, silmeins pils uauls da **Tujetsch** si da **Maun Sura**! Essend ei vegniu repatidamein fatg emprovas, e sin differentas modas, e cun tut „fliss“ applicadas e da nus auters cun nossas forzas sustenidas, mo essend ussa perschuadi, che quei tut seigi stau adumbatten, e quintassen ch'era nos signurs bostgers duessen ver en quei, suenter tontas emprovas fatgas e calar da mortificar nus, cun lavurs e spesas inutilas, che survargan nossa pussevltadad economica, senza ils minimis aspects d'era mo enzacuras puder sperar era mo ina pintga rendita, il resultat vegn ad esser, e quei senza fallir, avon che tuttas emprovas ein fatgas, vein era negins uauls.

4. Alleghescha il signur referent, seigi il schliet tractament da quel! Quei lai capir sin duas modas! Manegia el, nus ni el? Ha el manegiau siu personal, sche supplichein mo ch'el vegli far meglier! Ha el manegiau nus, il qual ei ualti probabel, sche secartin, ch'el detti cun siu agen pugn en dies els! Essend ton ad el, sco als auters bostgers adina obediu e fatg sco ei han cumandau „leider“! Secartin che quei sappi a nus buca vegnir snegau giu, cass cuntrari savein tras el sez mussar ora, che ni el ni auters sappien dir che nus hagian buca fatg tut quei ch'ei vegniu giavischau da temps en temps ed era per quei adina tochen oz vegni ludai da haver bien uorden, ed havevan era, tochen ils signurs bostgers han buca vuliu cuntschar, ed encunter natira megliurar. Nus selubin d'ira anavos sigl εμπrem cumpariu bostger Livers, tochen oz. Signur Livers ha giavischau in curtin beinclaus ora e vegnius cultivaus, quei ei immediat daventau, cun gronda breigia e cuost, signur Janca ha quel forsa era aunc viu, quei ha cuzzau biars onns, cun tutta atenziun, e qual ei staus il resultat? Il resultat ei staus quel che en quei curtin ei carschiu diltut, resalvond da quei, il qual ins spitgava – aschia ei tut stau perina da calar da metter spesas e quel schar ira en.

Quei ei passau tochen avon 4, 5 onns, allora ei vegniu giavischau da nies signur bostger superiur d'empruar ina cultura a **Carmihut**, era quei vein cun plascher acceptau, vein cumprau per in grond daner plontas, plantau, pertgirau, suenter turnau a cuntinuar, tenor giavisch, a cultura, ed allora buca mo mess sin la nova cultura in pastur, sonder sigl entir uaul **Carmihut** e **S.Brida**, cun pagar a quel 1 frs. per di che porta annual circa 200 frs. e varga I: la stad ed igl unviern da grondissimas nevadas cura che las cauras pon buca atras vegn ei buca pertgirau :I Era quella cultura, lai dubitar zun fetg, d'enzacuras far a nus plascher, dil render ei buca raschieni, sch'ins vul quintar las spesas, las qualas ein grondas avunda schon ussa senza aunc vuler adossar aunc pliras d'ina semeglionta natira, che vegnessen ad anflar adina pauc 500 frs. per onn, e quei entschavess tuttina ad esser per ina paupra vischnaunca, tier ils auters cuosts, dau ora per nuot, detgavunda! – ord las schon allegadas raschuns sco ord las suandontas savein buca capir co il signur referent ughegia, tut nunspitgadamein da a nus renfatscher tractament, nua che tuts bostgers da A tochen Z, signur Seeli era cumpriu, han adina menau si nossa vischnaunca sco muster ed era, teme in nuota da dir, buca senza raschun, nies uorden d'uauls era spargn I: e quei ei meglier pils selvadis che „Theori“ :I. Aschia per saver spargnar la lenna vein fatg ina via carrabla da duas uras, cun grondissims cuosts e lavur cumina per saver menar neutier caltschina da temps en temps, restrinschiu il dar lenna da baghegiar e classena; era fatg obligatori il baghegiar da crap tuts nuegls – nua anflan ei dapli voluntari?

Cheu vessen aunc bia d'obligar, en nies avantatg, che seigien buca stai tochen ussa maltractaders d'uauls e daventeien era mo cun la forza, semeglionts.

Nus essan en general adina stai, cun ils principis dils signurs bostgers d'accord, aber ord experienza e repatidas emprovas fatgas, vesein che quels ein buca dapertut aplicabels e gida tut nuot, vuler sfurzar la natira, paupras vischnauncas -. Nus vesein era tuttavida buca en che nos uauls mondien aschispert en decadenza, sco vegn pretendiu da glied che han quei aunc mai ad Locum balenzau -. Nus vein ils pli biars uauls, che han biala carschientscha e biala giuventetgna!

5. Quei che risguardescha la pasculaziun, essan d'accord, che seigi nuscheivla e fetg nuscheivla ei era quella che impedescha la vegetaziun ed era la plontaziun! Clauder ei caussa nunpusseivla, duvrass pli bia lenna che quei ch'ins pudess pretender dalla plontaziun, era il meglier resultat! Pertgirar ora ei carteivel sco schon avon menziunau, ed era caussa nunpusseivla! – Dismetter la pasculaziun I: sil funs sco avon maun ei :I ed aunc els uauls ei tenor nosa raschun e dapli che **Tujetsch** exista praticada economia, ina caussa nunpusseivla mo in solit mettel pudess gidar tier vegetaziun da nos uauls cun bien success. Numnadamein glied e tiers bandunar la val! Quei mass matei era vess; aber pusseivel sco tuttas creatiras creian, cartein era nus, che tut seigi scaffiu per nez dil carstgaun, sco era ils uauls. – Finalmein arriva e setschenta giu signur Seeli, cun siu referat, sigl **Uaul Niregl**, cun ad els tit. signurs, dar da crer stermentus prighels da lavinas. El po quei haver observau, passond la stad! – Nus encuntercomi, aber vein tochen en cheu, temps d'unviern aunc mai viu! Tgei po aber aunc daventar ei mo in che po saver! Che quella part uaul vesi ora bein, sa buca vegnir pretendiu, aber aunc bia meins sa vegnir pretendiu, che nus seigien la cuolpa da quei – secartein che negin vegni a pretender, schiglioc essan el cass da mussar ora quei I: sch'ei vegn pretendiu :I. Signur Seeli ha tutta raschun, da pretender, che la part digl **Uaul Niregl**, che mira encunter la **Val Bugnei**, seigi maltractada, nus mettein aunc vitier e schein ch'ella ei sin l'ossa sbutlada!

Aber deplorabel eis ei da signur Seeli, ch'el vul els tit. signurs schar crer che nus seigien ils auturs da quella extirpada e numna buca igl autur ch'ei ad els meglier enconuschents che a nus. Nus pretendein ch'il grad menziunau uaul seigi vegnius ruinaus per diever da baghegiar la via nova e la gonda part ei vegnida duvrada malnizeivlamein cun metter en tschiens petgas senza basegns, che ston schon ussa vegnir resersidas entras da crap, nua ch'era nus purtein nies agid leutier, ultra clauder tut nies funs suenter la via, cun petgas crap per spargnar la lenna. Quella sblutaziun dueva a sias uras, dallas autoritads esser meglier survegilada, sco era vegnir ponderau las consequenzas e buca mirar tier ed ussa vuler pretender che nus dueien far bien il mal dils auters. Tgi che ha destruiu duei era tenor lescha resersir! – sche la via ei per sia atgna cuolpa semessa en prighels, duei era segirar cun agid da sia cassa. Signur Seeli va aunc pli lunsch I: sche capin il tudestg :I per els tit. signurs far seperschuader, ch'ei seigien revoluzers che tut lein ni admoniziuns ni leschas ni camonds! Nus lein per quella gada per els tit. signurs buca diltut unfisar e signur bostger Seeli schanegiar cun concluder ch'el hagi scret siu referat en ina cumpleina alteraziun, resalvein aber, che sche quei laud duess aunc ina gada vegnir exprimius encunter da nus, vegnien a defender nosa honur e bien num, nunditgont tiazas persunas.

Encunter quella tresta e bassa expectoraziun da laud, vein aber tuttina la curascha da dumandar si, igl emprem signur bostger Livers, tochen neu sil present signur Seeli, sco era signur Coaz, bostger superiur da nies cantun, schebein ei sappien ni possien per cunscienza dir, che nus havein era ina suletta gada cunterdetg a sias ordinaziuns? Sulet duas gadas vein cunterdetg a ses giavischs e quei cun buca retscheiver subsidis e quei ord spir tema che quels pudessen haver tissi en la cua. Tit. Signurs els vesan clar ord il sura grad allegau, ch'ei buca da dubitar che hagian buca fatg nies duer, schiglioc fuss buca vegniu offeriu premis?

Finalmein propona signur Seeli ad els tit. signurs da vuler decretar!

1. Che la schetga sur **Sedrun**, en in dad els determinau temps, duei (sche capin endretg) vegnir tenor instrucziun serrada e determinada, vermakt. -
2. Entras ina cultivaziun, fatg daventar quella giuvna
3. Per saver far ch'il davos daventi, tutta lenna veglia sdripada ora e la pasculaziun, tochen autras ordras, serrada.

Aschia ha cun paucs plaids detg dabia, aber „leider“ buca pusseivel da menar ora!

1. Sche vein capiu – duei vegnir determinada, quei ei quella schetga schon da natira – serrada, ei

quella stada da nosa regurdientscha, ed ei aunc ussa per nus, e giavischein mo che quella duei restar serrada pil tagl, dacheudenvi, per nus ed auters.

2. Da far vegnir quella schetga giuvna essan fetg cuntents e legrass nus zun fetg e lessan era porscher nos survetschs aschilunsch sco pusseivel, aber ordavon lein per quella empermischun ina garanzia, che quei daventi, e quei pretendin ord raschun, che tuttas emprovas han tochen encheu menau tier negin favoreivel resultat, sonder plitost per dabia anavos.

3. Per saver menar ora il sura, stoppi tutta lenna veglia vegnir extirpada. Tier nus vegn ina semeglionta pretensiun, numnada ina pretensiun d'in um senza tgau, pli engiu han ei forsa in pli adattau num. Nus dumandain mo signur Selli, ha el enconuschientscha da quei uaul? Ei quei il cass, sche sto el haver viu, che quei uaul ha en quasi tut lenna veglia, resalvond sisum prosperescha quel tenor giavisch. Aschia stuess quei uaul cun pintga excepziun vegnir pinaus entuorn. Encunter questa pretensiun essan schon ussa necessitai da stuer formalmein protestar encunter, sch'els tit. signurs duessen encunter tutta nosa speronza, decretar u schar tier enzatgei semegliont, che fuss inresponsabel, ni avon Diu ni avon il mund, lura fussen schon franchai da lavinas, ed aunc pli fetg suttaposts da bovas, quei duei daventar mai, num cun la surforza Prussiana.

Plinavon zuppa signur Seeli il medem artechel, davos tier, il giavisch ch'els tit. signurs, vegnien era a decretar, che la pasculaziun en quei uaul seigi scumandada.

El sa pertgei el stat cun quella proposiziun en l'umbriva!, perquei ch'el sa bein avunda che quei I: sco schon allegau :I ei a nus nunpusseivel.

Vulend serrar giu quei uaul tenor giavisch dil signur referent, fuss al vischinadi da **Sedrun** fatg nunpusseivel, dapli saver tener tiers manedels, era strusch auters tiers senza immens donns, buca ton per la pasculaziun, igl uaul sez sco per motiv dil transit, che vein tras quel, per saver guder las autras pastiras, che circumdeschan quei uaul, sco era per aunc repeter ina gada, tgi pertgira ora, ni a tgi eis ei pusseivel da pertgira ora quel?

Ord las allegadas e fundadas raschuns vesan els tit. signurs en, che serrar giu in semegliont circuit avon casa, fuss passau ad in vischinadi memia datier. Essan aber dalla ferma perschasiun, ch'ei vegnien mai e pli mai a decretar enzatgei semegliont, cunzun senza buca esser ocularmein perschaudi, eis ei pusseivel ni buc!

Nus savein gnanc dubitar, ch'ei vegnien buca ad exaudir nus ed enviar signur Seeli cun siu malfundau rapport tier siu bien ruaus. Duessen els tit. signurs encunter tutta speronza buca anflar nossas raschuns per sufficientas e decretar tenor giavisch dil signur referent, sche fussen schon ussa necessitai da formalmein protestar encunter in semegliont conclus.

Nus lein aschia concluder, cun laschar ad els la causa grondamein per recumandau e laschein nus adina, en lur aulta protecziun e favur per recumandau, rugond per la protecziun divina, sur lur operar, sco era sur da nus e nies suar!

**Tujetsch**, ils 22 da schaner 1871


Per la suprastonza

Il president communal Lucas Caveng

Il scarvon communal Giachen Antoni Schmet

## 1871 - Brev da cunvenziun via nova Claus

La via da Cavorgia, da Claus enasi encunter Giepia, fuva ruinada e carschida en. Ils vischins da Cavorgia sedostan per ina migliur gia onns avon igl onn 1871. Ils da Maun Sut vevan buca adina sempel enviers la forza da l'otra vart. Igl onn 1871 vegn reconuschiu il giavisch e la vischnaunca migliura il tschancun dalla via da Claus encunter Giepia. Quella via fuva la suleta via, ina fuorma carrabla, da Cavorgia a Surrein, da leu enagiul Run e dil Run si a Sedrun. La via vegneva pil pli era numnada la via da bara pils da Maun Sut.



### Brev da cunvenziun per la via nova giun Claus digl onn 1871, ils 6 da matg

Havend pli baul il vischinadi da **Cavorgia** giu instanziau tier la ludeivla vischnaunca che quella cumpri ora per siu vischinadi ina via d'ira cun bos e menadiras da tut temps da **Claus enasi** encunter **Giepia**, quei sil mender donn dils funs da **Claus**, essend sia veglia via per part ruinada u carschida en cun plantas etc. etc.

Vesend la ludeivla vischnaunca la gronda necessitad per tala via al vischinadi da **Cavorgia**, ha quella lura suandau ed incumbensau il suttascret da tonpli gleiti ira giun **Claus** e stigar ora quei toc via nova cun lura aunc far giu cun ils proprietaris dil funs, che quella via peglia etc.

Pia oz arrivaus a **Claus** cun ils proprietaris da quels funs e stigliau e mesirau ora a scadin siu toc, che quella via nova peglia ch'ei sco sut suonda il final regulament per il funs e purteglas etc.

1mo. Pia entschiet oragiudem sin quei dil Valier da **Camischolas** e leu tschentau sin quei prau u grep ina geina; per quella far mantener vegn pagau 10 frs.; dapli da leu enasi eis ei aunc 9 fests, e vegn pagau 15 raps il fest, 1.35 frs.

2do. Enasisura vegn Rest Giuseph Jacomet cun 5 fests e 15 raps il fest, 0.65 frs.

3tio. Enasisura vegn Lezi Jacomet cun 5 fests e 15 raps il fest, 0.65 frs.

4to. Vegn Lezi Huonder cun 12 fests suenter il sura ei 20 raps il fest, 2.40 frs.

dito sur quei per schliet prau grass 12 fests a 50 raps ils fest, 6 frs.

dito enasisur quei da Gion Rest 23 fests a 1 fr. il fest, 23 frs.

dito sin quei prau far e mantener ina geina a quen siu 12 frs. cun l'obligaziun da schar ira sut il viadi da bara da 19 fests liung, che vidavon mava atras quei prau viers via si sut il baghetg en.

5to. Giachen Antoni Monn ha per 8 fests prau daver che va viadi a 1 fr. il fest, 8 frs.

6to. Sut casa da Gion Antoni Jacomet u Giger, aviert la gassa per 1 ½ fest, 4 frs.

Ha la vischnaunca pagau a scadin possessur dil prau total 68.05 frs.

Il vischinadi da **Cavorgia** paga ord quei per la geina giusum 5 frs.

Che quei seigi rugalau giu cun las parts, sco avon ei scret e mess per scret entras mei en num dalla vischnaunca e per ils cheu sura numnai attesta

Jacob Anton Schmid  
gerau da quei temps

Registrau ils 20 da zercladur 1891, el II. cudisch da marcaus sut pagina 181 nr. 320

## 1872 - Dispeta pervia dil buntaduir da Begliet

*Dispetas deva ei sco oz era, denter vischins, denter vischinadis e schizun denter las vischnauncas vischinontas. Per evitar malemperneiolas passan ils vischins da Dieni Sura e Sut avon il mediatur e lez retegn en ina cunvegna ils giavischs dad omisduas partidas. Sut punct 4 vegn schizun dau impurtonza al cullem che sedat ella gassa e quel astgan quels che mantegnan ils mirs prender si.*

### Dispeta pervia dil buntaduir da Begliet denter ils vischins da Dieni Sut e Sura


Ella dispeta pervia dil buntaduir da **Begliet** denter ils vischins da **Dieni Sut e Sura**, fatga pendentia avon il mediatur Plazi Condrau, ei quel suenter haver tedlau las parts a **Mustér** sut ils 12 da mars 1872 serendius oz culs respectiv vischins u proprietaris dils praus da **Dieni Sura e Sut** silla piazza dil buntaduir questioneivel. Havend mirau giu la localitad ei tras il mediatur e signur assistent Schmitd vegniu tier sequenta amicabla cunvenziun denter ils allegai vischins:

1. Ils possessurs da **Dieni Sura e Sut** buentan el communabel buntaduir da **Begliet** a **Dieni Sura**. Duess ei malgrad in bien uorden inaga ni l'otra muncar sufficienta aua en quei begl, sche han ils da **Dieni Sura** igl emprem dretg da buentar, aschia ch'ils da **Dieni Sut** ston en tal cass star anavos cun lur muvels. Buc'in vischin duei enten buentar maltractar ils tiers d'in auter.

2. Per dar meglier plaz e vegnir tier meglier uorden duei la **Gassa** dil buntaduir vegnir slargada sufficientamein e zuar sisum vegn ella carschentada giu da maun sut entochen il cantun dil clavau da frars Hetz, la mesadad sut dalla **Gassa** vegn slargada si da maun sura. Il mir encunter il prau duei vegnir fatgs si sco s'auda ed en **Gassa** fatg ina sulada.

3. Las spesas dalla expropriaziun per slargar la gassa e per far quella lavur, las spesas da mediaziun, sco era quellas pervia dalla perdetga digl emigrant statalter Giachen Martin Schmetd (sche vegnan buc a survargar 10 frs.) pagan ils vischins communablamein a proporziun da lur funs a **Dieni**. Ils geraus da vischnaunca han da far ora il prezi dil prau expropriau, sco era eventualas dispetas sur la repartiziun dils cuosts.

4. Il cullem en **Gassa** pon quels che mantegnan ils mirs far si. Sisum ed anoragiu frars Hetz e Duri Berther, schi lunsch sco lur prau va, da leuanen entochen la punt G. Fidel Caduff e Duri Berther.



5. Per buca tartignar l'aua dil buntaduir vegn Duri Berther a tschentar si in agen begliet, nua che l'aua va ord il begl da buentar per lavar resti ni auter diever da sia casa.

Quei tut ei daventau per evitar malemperneivladads, dispetas e conservar la buna pasch denter vischins.

Per confirmaziun da quella cunvenziun suttascrivan omisduas parts ils dus originals da questa cunvenziun.

La part dil ploign

D. B. Berther  
per G. Fidel Caduff

La part dalla risposta

Sep Antoni Deplaz  
Gion Bistgaun Hetz  
Sep Antoni Hetz  
per Toni Derungs

Remarca: **Rueras**, ils 27 d'avrel 1930. Retschert la sura brev da signur gerau Baseli Berther, il qual ei en possess da quellas scartiras.



Davontier **Dieni**

## 1872 – Gassa e repass a Zarcuns

*In dretg niev vegn creaus a Zarcuns. Sto esser ch'ei regeva buca il meglier uorden cun passar culs muvels, mo era entras ils habitonts. Cun quella cunvenziun vegn dau migliur a quei problem.*

### Cunvenziun per la gassa e repass dadens il vitg Zarcuns, in dretg niev

En vertit da questa scartira vegn ei memorisau che denter la ludeivla vischnaunca da **Tujetsch**, per quella gerau Giachen Antoni Schmet d'ina vart e da l'autra vart Vigelli Gioseph Monn e siu quinau Gion Antoni Beer, giuven, da **Camischolas**, seigi vegniu serrau giu e cumprau ora in viadi d'in fest lad biebein vi **Zarcuns** ch'era vidavon in viadi da fretg dadens il vitg che vegn si viers encunter il baghetg d'assistent Schmetd e statalter Vigielli Giacomet e va sut ils orts ora encunter la baselgia da Nossadunna – zuar duvreivel quei viadi, ni sche ins vul dir sco gassa per glied e tiers da tut temps, bein capiu aber, che ni vischins ni jasters hagien d'ira ordsura da quei viadi cumpraus, seigi lura glied ni tiers da temps da fretg, seigi quei baul ni tard.

Per cheu encunter eis ei pagau als proprietaris da quei funs, al Vigelli Monn 58.40 frs. ed a l'auter 10 frs. sco muossa il cudisch da quen da vischnaunca.

Per verdat e vigur da tala scartira e mess per scret quei per igl onn 1872, ils 20 da december, entras mei sco ugau da Vigelli Monn e sco gerau da vischnaunca,

attesta en num dallas parts ch'ei seigi aschia sco sura scret.

Giachen Antoni Schmetd, gerau ed ugau da Vigelli Monn

Registrau egl I. cudisch sut pagina 445 giudem il plat fegl, attesta, **Tujetsch**, ils 17 da matg 1878

Giachen Antoni Schmetd  
registratur

*Cunvenziun per la gassa e repass  
dadens il vitg Zarcuns in dretg niev*

*En vertit de questa scartira vegn ei memorisau che denter la ludeivla vischnaunca de Tujetsch per quella gerau giachen ant. Schmetd de ina vart, che l'auter vart Vigelli gioseph Monn, e siu quinau gion ant. Beer giuven de Camischolas seigi vegniu serrau giu e cumprau ora in viadi de in fest lad biebein de Zarcuns che era vidavon in viadi de fretg dadens il vitg che vegn si viers encunter il baghetg de assistent Schmetd e statalter Vigielli Giacomet e va sut ils orts ora encunter la baselgia Nossadunna - zuar duvreivel quei viadi, ni sche ins vul dir sco gassa per glied e tiers da tut temps, bein capiu aber che ni vischins ni jasters hagien d'ira ordsura da quei viadi cumpraus, seigi lura glied ni tiers da temps da fretg seigi quei baul ni tard.*

*Per cheu encunter eis ei pagau als proprietaris de quei funs, al Vigelli Monn fr. 58.40 e l'auter fr. 10. sco muossa il cudisch de quen da vischnaunca.*

*Per verdat e vigur da tala scartira, e mess per scret quei per il an 1872, ils 20 de december, entras mei sco ugau de Vigelli Monn, e sco gerau de vischnaunca.*


*Giachen ant. Schmetd gerau e ugau de Vigelli Monn*



## 1872 - Contract cul spazzatgamin Stoffel

*Pertuccont prevenziun encunter barschaments, era il far giu fulin ina caussa inevitabla ed impurtonta. Aschia fuva il spazzatgamin ina persuna ufficala e numerus protocols plaidan dad el e sia elecziun. El stueva vegnir duas gadas ad onn e retscheveva in «vargelt», in daner da spetga.*

Sut il datum da 1872, mars ils 3, eis ei vegniu serrau giu suandont accord denter meister "Camifeger" Pieder Stoffel dalla **Val S. Pieder** e la ludeivla vischnaunca da **Tujetsch** appartenent tier far giu il fulin dils tgamins per l'entira vischnaunca e zuar quei accord ei serraus giu nundeterminadamein ton d'ina vart sco da l'autra.



1mo.

Deigi il meister Camifeger vegnir duas gadas per onn e far giu ils tgamins, l'emprema il meins d'avrel e l'autra il meins d'october.

2do.

Vegn ei pagau per omisduas gadas il vargeld dalla vischnaunca, fl. 5.

3tio.

Tgamins da treis alzadas vegn ei pagau per scadin 22 raps. Ils tgamins mo da duas alzadas vegn ei pagau mo 17 raps.

Aschia serrau ed approbau dalla vischnaunca e da meister Camifeger e per omisduas parts approbau da mei

Jacob Schmet, actuar da vischnaunca

1873, ils 24 da mars ha Pieder Stoffel surpriu en num da siu bab sco Camifeger dalla vischnaunca da **Tujetsch** grad sco il sura accord ei staus fatgs cun siu bab, attesta

Jacob Schmet, actuar da vischnaunca



Sedrun

## 1872 - Uorden pil gudiment dallas alps

*Sut ils 4 da mars 1872 ei stada radunada la cumissiun pervia da sedeliberar co guder las alps e pastiras da casa per igl onn present ed ei finalmein vegniu tier suandont uorden sco cheu suonda.*

1. Eis ei concludiu da cargar las nuorsas sco igl onn vargau igl emprem si **Mut** e las **Vals** e suenter sin la **Puzza**, bein aber si **Mut** dueien ellas buca star pli che quater jamnas. Anfla la vischnaunca d'ira naven cun quellas pli baul, sche stat ei sura a sias ordinaziuns, cass da basegns aber per igl atun, pon las nuorsas ira via sin l'**Alp Tschamut** e **Maighels**.
2. Eis ei concludiu da cargar tut ils tiers ensemen, vaccas, genetschas, stiarls e stiarlas e lura suenter ver repartiun las alps, da schar sura a mintga alp sco ei anflan per bien. Las alps dueien vegnir partidas ed ulivadas e suenter per lura tratg la sort sco ils onns vargai.
3. Dueien las alps vegnir messa ina buna ed ina schliata ensemen e zuar sin sequenta moda.
  1. Ei mess ensemen l'**Alp Tschamut**, **Maighels** e **Surpalits** e **Val Strem**.
  2. La **Val**, **Tiarms**, **Nual** e **Cuolm Cavorgia**.
  3. Ei mess ensemen **Val Giuv**, **Culmatsch**, **Val Mila** e gl'entir **Caschlè**.
4. Il **Cuolm Cavorgia** duei star persuls sco igl onn vargau cun las medemas untgidas.
5. Ils cavals dueien vegnir cargai en **Pardatsch** sco igl onn vargau. Era eis ei schau tier da prender ora quels per duvrar da trer tons dis sco igl ei stau fixau igl onn vargau, resalvond per donns che fagessen cura ch'ei vegnan priu ora ei caussa dil proprietari dil tier.
6. Ha la cumissiun era concludiu da schar pastur da vadials omisdus **Pardatschs** e da schar metter en vadials en cheu tgi che vul - cun quella consideraziun eis ei schau per ils vadials il **Stavelsecs** entochen sitier la **Gonda**.
7. Eis ei concludiu da schar via l'alp dil **Tgom**, sch'enzatgi vul prender cun la terminaziun digl onn vargau, resalvond quei toc dil **Stavelsecs** ch'ei prius naven pils vadials. Vulcan lura quels prender si l'alp e vegnir en leu cun tiers jasters, sch'eis ei schau tier da vegnir en cun quels otg dis avon che quels dalla vischnaunca vegnan cargai, bein aber cun la clara cundiziun che quels tiers catschai ensemen da cargar sin l'alp dil **Tgom**. Untgidas duei vegnir dau a neginas alps, priu ora sco igl onn vargau.
8. Davart dils vischins da **Tschamut** eis ei vegniu lamentau ch'els seigien vegni scultri empau memia fetg igl onn vargau cun sia pastira da casa, en particular priu naven la **Tgauma**. Els giavischassen fetg che la vischnaunca schassi quei ad els sco ils onns vargai. Ha la cumissiun e la vischnaunca concludiu da guder ensemen per igl onn present.
9. A casa po ei vegnir tenui dus tiers per fiug tgi che ha, aber buca cavals.
10. Ils vadials tumprivs eis ei era concludiu da schar cargar cun ils auters tiers sch'enzatgi vul.
11. Mintga vischin duei dar en ses tiers ch'el enviarna e ston ira ensemen ella alp.
12. Dau untgida per **Cuolm da Vi** da vegnir giu entochen giusum las **Foppas** e lura ir suenter la neiv en si ell' alp.
13. **Strem** ha per untgida la **Gonda** sco igl onn vargau.
14. **Mila** e **Caschlè** han per untgida igl **Uaul Flurin**.
15. Duei vegnir terminau denter las duas alps **Surpalits** e **Tiarms** cun sias terminaziuns avon cargar ad alp.